

Amanat Sultan Pahang kepada kerajaan negeri untuk generasi akan datang

Tinggalkan warisan berharga

KUANTAN – Sultan Pahang, Sultan Ahmad Shah mengingatkan kerajaan negeri supaya memberikan keutamaan kepada soal pemuliharaan alam sekitar ketika melaksanakan rancangan pembangunan dalam semua bidang.

Baginda bertitah, kesan terhadap alam sekitar mesti diambil kira sama ada di kawasan tanah tinggi, punca air, sungai, tasik mahupun pulau, untuk memastikan ia dapat diwarisi sehingga ke generasi akan datang.

“Pemuliharaan alam perlu kerana negeri dan isi kandungannya akan diwarisi generasi akan datang. Kita wajib meninggalkan satu warisan yang berterusan dan berkekalan kepada mereka,” titah

baginda.

Sultan Ahmad Shah bertitah demikian ketika menyempurnakan pembukaan sidang Dewan Undangan Negeri (DUN) Pahang penggal keempat kali ke-13 di Wisma Seri Pahang di sini semalam. Turut berangkat, Sultanah Pahang Sultanah Kalsom Abdullah.

Menurut baginda, keadaan alam sekitar yang baik dan sempurna serta dikawal rapi, boleh menggalakkan kegiatan pelancongan di negeri ini, sekali gus membantu mewujudkan kegiatan ekonomi yang baik untuk negeri.


Pada masa sama, baginda turut meminta kerajaan negeri mempercepat langkahewartakan tanah rizab Orang Asli selain berusaha mewujudkan peluang ekonomi un-

tuk masyarakat tersebut.

“Orang Asli tidak lagi boleh mengamalkan kehidupan seperti dahulu, bahkan mereka mesti menyesuaikan diri dengan peradaran masa. Kerajaan beta tidak akan mengabaikan kepentingan Orang Asli,” titah baginda.

Sementara itu, langkah kerajaan negeri membina kira-kira 33,000 unit rumah yang berharga RM150,000 sejak 2013 sehingga kini, amat menggembirakan baginda.

“Beta juga gembira kerajaan negeri mengambil inisiatif melaksanakan program perumahan berharga RM80,000 seunit untuk dimiliki rakyat dan sejak Mac lepas sehingga kini sebanyak 1,000 rumah ini telah berjaya dibina,” titah baginda. – Bernama



SULTAN Pahang (tengah) menerima naskhah titah ucapan daripada Adnan sebelum menyempurnakan pembukaan sidang Dewan Undangan Negeri di Pahang di Wisma Sri Pahang, Kuantan semalam.